

4340



LE  
VERITABLE,  
O V  
LE MOT EN AMY;


*De Messieurs les Princes, adressé à la  
Royne Mere.*

VERITABLE

LE MOT EN VAIN

De l'usage des lettres, et de la  
raison humaine

1737



## A L A R O Y N E

*Mere.*

**C**E n'est pas sans sujet (Madame) qu'un Ancien a remarqué, qu'en la Loy de Dieu, le Cōmandement qui porte d'honorer Pere & Mere, est le premier de la secōde Table, & tout joignē le precepte qui regarde le service & l'adoration deuē à la Diuinité, tant ces deux deuoirs semblēt estre inseparables l'un de l'autre. C'est ce qui rend aussi le cœur du Roy, non moins deuotieux à s'acquitter religieusement du respect qu'il doit à vostre Majesté, que de ce qu'il est obligé de rendre à Dieu, afin que par vne pieté incomparable, son regne soit comblé de toutes sortes de benedictions, & que ses peuples se voyans regis par vn Prince si vertueux, s'estimēt les plus heureux peuples du monde. Et encores qu'il soit touché de cette tendre amour en vostre endroit, par l'instinct de son bon naturel: Si est-ce que le ressentiment qu'il a des grandes preuues de l'amitié que vous luy auez tesmoignée dès le berceau, avec le soin particulier que vostre Majesté a tousiours eu de conseruer l'Estat en sa splendeur, lui est encores vn puissant aiguillon pour l'exciter à recognoistre qu'il vous doit apres Dieu, & l'heureuse

conseruation de sa personne, & toute la prosperité de son Royaume. Car si par vostre grande sagesse toutes choses demeurerent tranquilles au dedans, lors que vous teniez le gouuernail, & si par vostre generosité vous refrenastes l'audace de ceux qui sembloient troubles nostre repos, sous des pretextes imaginaires vous estendistes encore ce soin au dehors, afin que la France estant fortifiée de toutes parts, n'eust non plus à craindre qu'un rocher qui se iouë des flots & des vagues. Vostre Majesté n'eust donc pas plustost arrousé de ses larmes, les cendres de ce grand Monarque son Espoux, qu'elle ne meditast tout ce qui pouuoit estre necessaire au bien commun du Royaume. Ce fut lors qu'assistée du Conseil des anciens Ministres de l'Estat, elle ietta les yeux sur l'auguste alliance des deux plus puissantes Couronnes de la terre

Neantmoins, comme les loüables actions ne sont pas tousiours approuuées de tous, vostre Majesté se ressouuient de combien de difficultez ce haut dessein fut trauersé : Mais vostre vertu s'opposa lors comme vn mur d'airain à tous ceux qui voulurent empescher l'accomplissement d'une chose autant désirée des vns, qu'elle estoit à contre-cœur aux autres. Ainsi, Madame, surmontant genereusement tout ce qui se rencontra de plus fascheux, vous donnastes à l'Espagne vne ieune Princesse, que cette Nation estime estre aujourd'huy tout son bonheur, comme aussi la France ne peut assez benir l'heur & le iour que l'Espagne luy a fait present

d'un don si précieux, qu'est celuy qu'elle possède en la personne d'une Princesse si vertueuse & si accomplie qu'il ne s'y peut rien desirer. De sorte qu'il semble qu'entre tant de glorieuses actions que racontera un iour l'histoire à la posterité, il n'y en a point qui celebre davantage vostre tres-illustre nom que feront ces alliances, lesquelles aussi on peut dire estre cause du repos de la Chrestienté. Pourtant vostre Majesté, se ressouvenant des travaux qu'elle a supportez pour accomplir ce chef d'œuvre à son contentement, & se representant aussi l'utilité que l'Estat & la Religion peuvent tirer de la mutuelle intelligence & correspondance de ces deux grandes Monarchies, ie ne doute point que vous ne soyez grandement jalouse de l'ouvrage de vos mains, & que comme vous vous estes courageusement opposée à ceux qui ont voulu empêcher ces Mariages, vous ne sachiez aussi par vos sages & prudens Conseils, arrester l'impetuosité de certains esprits, qui voudroient nous en faire perdre le fruit, & qui n'ayans peu rompre une si sainte alliance, desireroient la rendre du tout inutile. Ce discours (Madame) semblera à quelqu'un, n'estre pas le langage du temps, comme si ne parler selon leur goust, n'estoit pas estre bon François: Mais ayant tousiours seruy selon ma foible portée, & sous l'honneur de vos commandemens, & en l'adherance des anciens ministres du Royaume, i'estimerois de faillir à moy-mesme, & comme trahir mes sentimens, si ie taisois à vo-

stre Majesté ce que ie croy & pense du court  
 des affaires presentes. Ce seroit donc espouser  
 aujourd'huy vne forme de gouuernement du  
 tout contraire aux sages Conseils de ceux qui  
 vous ont si fidellement assistée durant vostre  
 Regence, s'il falloit voir en nos iours alterer ce  
 que vous auez si sainctement conserué. Mais  
 on pourra dire sur cela, que si quelque rupture  
 doit arriuer, ce ne sera pas du costé de la Fran-  
 ce, & que le Roy d'Espagne ne mettant ny bor-  
 nes, ny limites à son ambitioñ, s'esleue tousiours  
 plus en opprimant nos voisins & nos alliez.  
 Que son establisement ne peut estre que sus-  
 pect, & qu'il seroit en fin à craindre que ce Con-  
 querant ayant tout soubmis à ses pieds, n'eust  
 enuié d'entreprendre vn iour contre la Fran-  
 ce. Surquoy, i'ay à dire, que mon intention  
 n'est pas de faire icy vne Apologie, comme si  
 i'estois Aduocat de la cause de ce Prince, pour  
 le iustifier de telle accusation, & d'autres sem-  
 blables, dont ie voy que les heretiques ont la  
 bouche plaine pour le rendre odieux. Il est  
 neantmoins tout visible, que c'est le propre des  
 Monarchies naissantes d'estre tousiours stu-  
 dieuses de leur progres & auancement, ainsi  
 qu'on vit vne Republique Romaine monter à  
 ceste grandeur formidable, qui luy rendit tou-  
 tes les Nations du monde tributaires. Progrez,  
 qui ne peut que donner de la ialousie à ceux qui  
 se persuadent, que l'Espagne ne scauroit par-  
 uenir à la grandeur qu'ils s'imaginent, que par  
 leur domination & affoiblissement. O graces à

Dieu, c'est chose que la France n'a pas à redouter, parce qu'elle ne luy cede en force ny en puissance, comme elle luy a tousiours fait ressentir aux occasions : Pourtant ie demeure volontiers d'accord, que deffendre, que soustenir, & proteger nos voisins & nos alliez, & c'est chose iuste, & tres-digne d'un grand Roy. Mais aussi i'oseray dire apres tous les plus sages Politiques, que pour rendre vne protection legitime, il faut que la cause d'où elle dériue, soit d'elle mesme si iuste qu'il ny ait rien à reprocher, & que les armes qu'on employe pour proteger autrui, soient accompagnées de tant de iustice, qu'on prenne honneur en vne telle protection, & qu'on n'y encoure aucun blasme. Pour exemple, s'il arriuoit, comme nous auons veu en nos iours, que des peuples forcenez appellassent vn Prince estranger pour arracher la Couronne de dessus le chef de leur Souuerain, & qu'avec ce crime d'Estat ils y adioustassent l'impieté, & que d'une main prophane & sacrilege ils renuersassent & Temples & Autels, avec scandale de toute la Chrestienté, ie laisserois à iuger aux plus religieux, quelle iustice il y auroit aux armes du Prince, qui souz couleur de voisinage ou d'alliance, voudroit soustenir & fortifier de tels horribles attentats. Je leur lairois encores à iuger en conscience, si les Auteurs de ces desordres estans chastiez selon l'enormité du forfait, s'il y auroit la moindre apparence de raison de les plaindre, & de destourner leur ruine. S'il y auoit donc quelque chose de sembla-

ble meslé parmy la cause de ceux cõtre lesquels le Roy d'Espagne prẽdroit les armes, ie ne doute point que pour proches qu'ils fussent à autruy, il y eust aucun merite, ny deuant Dieu, ny deuant les hommes, d'entreprendre de les proteger. l'estime au contraire, qu'ils deuoient estre reputes ennemis communs de tout Prince craignant Dieu, & qui s'honore du tiltre de Prince Catholique. Si d'autre part il se presente des occasions, où les foibles recourent à la protection des plus puissans, soit pour se voir opprimez en leurs personnes, ou pour souffrir vne violence vsurpation de leur bien ou de leur liberté; ie ne doute point qu'en ce cas là, les armes d'un protecteur ne fussent iustes, & approuues d'un chacun. Toutesfois; auant que de reparer vne offence l'espée à la main, il y a tant de voyes de douceur qu'il faut tenter auparauãt; qu'on peut dire que le dernier remede doit estre celuy, qui ouurant vne guerre, ouure vn abyssme de maux & de calamitez. Pourtant, si quelqu'un de nos voisins gemit, & se plaint iustement des depottemens du Roy d'Espagne, il semble que le Ciel vous ait reseruee iusques à present, pour demeurer arbitre entre ces deux Monarques, & faire que par vostre prudence & entremise les choses se traittẽt avec tant de moderation, que la concorde que vous avez si dignement establie entre eux s'altere tant soit peu. C'est là le plus seur, le plus vtile, & le plus innocent conseil que vostre Majesté scauroit donner au Roy, luy persuadant par vos sages remonstrances, qu'il y a  
peut-estre



peut-estre tels qui le voudroient animer à la  
 guerre, lesquels n'ont autre but que de profiter  
 dans la confusion, & à qui les tristes euenemens  
 d'un trouble sont moins sensibles qu'à ceux que  
 la longue experience des choses rend plus rete-  
 nus à entreprendre des desseins hazardueux, Non  
 que vostre Majesté ayant l'ame genereuse, com-  
 me elle ne voulust rien conseiller qui fust au  
 dommage & au des-honneur de l'Estat. C'est  
 pourquoy la grande creance qu'elle a auprès de  
 sa Majesté Catholique, la rendra si capable de  
 contenter le Roy, sur le differend de la Valto-  
 line, que les Catholiques du pays n'espereront  
 pas moins de support de la creance, qu'ils en ont  
 eu iusques à present de leur plus proche voisin.  
 Ainsi les choses seront remises en leur premier  
 estat, sans que nos Alliez souffrent aucune op-  
 pression. Cette œuvre est si importante & si me-  
 ritoire, qu'il est mesme à esperer que sa Saincte-  
 té, pour le bien vniuersel de la Chrestienté, y  
 contribuera tout ce qui despend de l'autorité  
 spirituelle, qu'un pere commun doit à conser-  
 uer la paix entre deux si puissans Monarques. Je  
 ne doute point aussi que vos saints desirs ne  
 soient puissamment secondez des Ministres de  
 l'Estat. Car si les vns, comme tres-illustres Pre-  
 lats, sont touchez d'un zele seruent enuers la  
 Religion, pour empescher que l'heresie ne se  
 preuale de la discorde des Princes Catholiques,  
 il ne faut point douter que les autres capables  
 personniages qui assistent sa Majesté, n'ayent  
 pour principal object la paix du Royaume. En-

tre autres ce grāue Magistrat, és mains duquel est le sacré dépost de la Iustice, prenoit par sa sagesse, que le plus grād malheur qui pourroit arriuer, seroit si en pensant remedier au dehors, on verroit saillir vne source de maux dans les propres entrailles de la France. Mesmement ce Seigneur, que sa Majesté a depuis peu rappellé auprès d'elle, pour l'admettre aux ministres de l'Estat, se sçaura rēdre en cette occasion non moins necessaire par la prudence de ses Conseils, qu'il s'est tousiours signalé par les preuues de sa valeur. I'ose encores esperer que ce bon Religieux, qui a l'honneur d'estre Directeur de la conscience du Roy, le rendra si sensible aux interests de la Religion, que nulle consideration d'Estat ne le touchera, qu'autant que l'honneur de Dieu s'y trouuera conserué, afin qu'en la qualité glorieuse qu'il possède d'estre Fils aîné del'Eglise, il surmonte en zele tous les Princes de la terre. Bref ces Messieurs, qui ont auioird'huy part aux Conseils de sa Majesté, estās tous clairs-voyans, comme ils sont, & n'ayans pas moins d'experience que les anciens Ministres de l'Estat, imiteront leur mesme moderation: Car comme dit autresfois vn Chancelier de France à vn de nos Connestables, encores que les gens de robbe longue n'aillent pas à la guerre, ils sçauent neantmoins quand il la faut entreprendre, afin de ne rien faire à la haste, dont on se puisse repentir à loisir. C'est pourquoy ils consideront tous meurement, & sans estre portez d'autre passion que de l'amour du bien publicque,

la vraye felicité du Royaume consiste à le rendre florissant par vne paix de longue duree, & que les euenemens de la guerre sont la plus-part incertains, & ne despendent que du sort. Ils considereront qu'un bien present, constant & solide, est tousiours à preferer à celuy qui est douteux. Ils considereront le peril qu'il y a de remuer, & faire agir vn corps remply de mauuaises humeurs, soit pour le mescontentement & chagrin ordinaire des vns, ou soit pour la faction intestine des autres. Ils considereront quel gouffre de despence c'est qu'une guerre, & comme dans les armes l'autorité des Souuerains est moins absoluë qu'en pleine paix, chacun presumant estre si considerable dans le trouble, qu'il croit qu'on ne luy doit rien refuser de tout ce qu'il demande. Ils considereront que si nous auons à nous instruire par les choses passees, nostre histoire nous apprend, que ny les Venitiens, ny autres Potentats d'Italie, ny d'ailleurs, ne nous ont iamais assiste d'un secours fauorable en quelque entreprise que nous ayons fait avec eux, tant c'est le propre des Nations estrangeres de ne desirer d'estre confederees avec la France que pour leur bien particulier, & que par tout où elles trouvent leur vtilité, l'interest de leurs Alliez ne leur est pas fort sensible. Ils considereront qu'au dessein d'une guerre contre le Roy d'Espagne, il y a peril en tous les deux, ou soit de n'y employer pas les Huguenots, ou soit de leur mettre les armes à la main, parce qu'au premier cas ils demeureroient simples spectateurs de la

tragedie, & espioient l'occasion d'en tirer auantage, comme aussi en les armant sous l'autorité du Prince, il seroit à craindre que les choses ne prissent vn tel cours, qu'il seroit puis apres difficile de les faire desarmer par la mesme autorité. Ioint que quelque contenance que ces gens là fassent, ils seront fort peu eschauffez à venger cette querelle, & ne desireront de nous y voir engagez que pour auoir tant plus fauorable occasion de s'en preualoir, comme ils ont tousiours fait. Finalement ces Messieurs considereront, qu'il est infallible qu'apres vn an ou deux de guerre on parlera d'vne paix, & que les tristes euenemens en estats communs aux deux Nations, il n'y a accord qui leur redonne le sang de tant de valeureuse Noblesse qui s'y sera perduë, outre les villes saccagees & mises en poudre, sans dire la desplorabile calamité des peuples dans les Prouinces, où l'horreur des pestes & des famines sera le continuel spectacle de nos yeux. Non qu'il ne soit raisonnable, voire necessaire, que tout Prince voyant son voisin armé, ne se doioit tenir sur ses gardes, & pouruoir à la seureté de la frontiere de ses Estats, cōme a tres iudicieusement fait le Roy, en l'asseurance qu'il a toutefois de la retenuë de ceux qu'il honore du cōmandement de ses armées, afin qu'ils n'allument pas la guerre qu'à l'extremité, & apres auoir tēté toute sorte d'autre remede. Ces choses ainsi considerées, & par vostre Majesté, & par ces dignes Ministres, l'esprit du Roy se trouuera fortifié de si sages conseils, qu'avec son inclination naturelle

à embrasser le bien de son Royaume, il prestera encores l'oreille aux bons aduis de ses plus fideles seruiteurs. Ce sera à cette liuree qu'il les remarquera estre vraiment bons François, & non à vne passion turbulente, qui sous couleur de l'honneur de la France, nous ietteroit en de si grands malheurs, qu'il nous lairroit vn eternal regret de ces sages vieillards, lesquels par la grande moderation de leur esprit, ont tousiours preferé le repos, & la tranquillité du Royaume, à toute sorte de mouuemens, pour specieux qu'ils peussent estre. Ce qu'il y aura donc à demesler entre ces deux grands Roys, se terminera par la douce & amiable negotiation des plus sages, ainsi que vostre Majesté l'a tousiours sceu pratiquer, sans dōner cette esionysance aux ennemis de la religion & de l'Estat, de voir perdre par leurs artifices tout le fruit d'une Alliance qui vous cousta si cher, & que vous accomplistes si heureusement, nonobstant leurs trauerses. De cette genereuse resolution depēd aujourd'huy le salut du Royaume. Chacun se ressentira obligé par vos bons offices, de recognoistre vostre Majesté, n'estre pas moins Mere de l'Estat, qu'elle l'est de la sacrée personne du Roy. Mesmement le louāble project de cette nouvelle Alliance avec l'Angleterre, est encores deu à vostre prudēce, y ayant disposé sa Majesté, comme vous auez fait. Nous ne doutons point que vous n'en desirez l'accomplissemēt en l'esperāce que vous auez, que par l'intercession de la France, l'hōneur de nos autels pourra estre

vn iour redressé en ces pays là, & que les pauvres Catholiques s'y esioüiront grâdemment de l'heureuse presence d'une Princesse dont la vertu leur sera en admiration, comme estant aussi issuë de la plus illustre, & plus Chrestienne maison de l'Europe : Voila Madame, quels sont les vœux des plus moderez, touchant l'entreprise d'une guerre estrangere. Et si pour desirer vne concorde perpetuelle entre ces deux grands Roys, ils ont à estre Espagnols, il ne faut point douter qu'il n'y ayt tousiours beaucoup de pareils Espagnols, en la crainte qu'ils ont, qu'il n'y ait que la seule Heresie qui tire auantage de ceste diuision. Ce n'est pas que pour estre sensibles en cette partie là, il y ait aucun d'eux qui voulust pour chose du monde, violenter l'amour & la fidelité qu'il doit au Roy son Prince naturel. Ils ont tous au contraire, les mains leuées au Ciel, ils prient continuellement pour sa prosperité, & pour la conseruation de ceste Monarchie. Ils desirent que le saint Esprit preside tousiours au milieu de son Conseil, & qu'en la conduite du vaisseau, les Pilotes n'ayent pour Ourse, que l'honneur & la gloire de Dieu, puis que l'Eglise ne gemissant plus sous la persecution des Caligules & des Nerons, on peut s'esioüy & dire, que l'Estat est maintenant dans la Religion, & qu'il ne peut subsister qu'autant qu'elle sera conseruée. Car tous les Roys Chrestiens ont jetté leurs Sceptres, & leurs couronnes aux pieds de la Croix du fils de Dieu, & se sont faits vassaux & tributaires de son regne. Ainsi pour

ueyant par vostre prudence à la conseruation de la paix au dehors du Royaume, les rayons de ceste mesme prudence sestendront encore sur toute la Frâce, pour la rendre tousiours plus florissante en la cōtinuelle paix qu'elle respirera avec ses compatriotes, sans esprouuet dauātage quelles sont les calamitez d'vne guerre ciuile. En fin (Madame) les anciens seruiteurs du Roy que vous obligastes tant par vos liberalitez, durant ceste heureuse Regence, trouueront aussi vn favorable support en vostre Majesté, sur l'esperance qu'ils ont qu'elle perluadera tousiours à ce genereux Prince d'auoir vn tel soin d'eux qu'ils ne mangent plus leur pain en amertume, qu'ils ne trempent plus dans leurs larmes, & que recueillis gracieusement par ses Ministres il ne tombe iamais en leur pensee qu'il y ait Cour au monde, ou la vertu ait plus de prix, & où les seruices soient mieux recogneus qu'en la Cour de ce grand Roy.

F I N.

